

22/06/2005

PERNIAGAAN-FORUM

FORUM EKONOMI ISLAM SEDUNIA AKAN DIADAKAN PADA OKT

KUALA LUMPUR, 22 Jun (Bernama) -- Forum Ekonomi Islam Sedunia (WIEF), dahulunya dikenali sebagai Forum Perniagaan OIC, akan diadakan di sini mulai 1 Oktober tahun ini.

Forum itu dijangka dihadiri oleh beberapa ketua kerajaan, termasuk Perdana Menteri, Datuk Seri Abdullah Ahmad Badawi; Perdana Menteri Pakistan, Shaukat Aziz; Presiden Indonesia, Susilo Bambang Yudhoyono; Presiden Senegal, Abdoulaye Wade; dan Perdana Menteri Bangladesh, Begum Khaleda Zia.

Bekas Perdana Menteri, Tun Dr Mahathir Mohamad, dijangka menyampaikan ucapannya pada jamuan tengahari.

Menjelaskan perincian mengenainya di sini, hari ini, Ketua Pegawai Eksekutif Institut Strategi dan Kepimpinan Asia (ASLI), Datuk Michael Yeoh, berkata forum itu akan membincangkan isu-isu utama yang dihadapi oleh masyarakat Islam dari perniagaan dan ekonomi hinggalah kepada sains dan teknologi.

"Forum itu akan juga digunakan bagi menghubungkan operasi perniagaan negara-negara bukan Islam, khususnya di Eropah, dengan negara-negara Islam," katanya pada sidang media di sini yang juga dihadiri oleh pengerusi bersama WIEF, bekas Timbalan Perdana Menteri, Tan Sri Musa Hitam.

ASLI, Kementerian Luar Negara, Dewan Perniagaan dan Industri Islam serta Pusat Pembangunan dan Perdagangan Islam adalah penganjur bersama acara yang akan berlangsung di Hotel Sunway Lagoon Resort itu.

Shaukat Aziz akan menyampaikan ucap-tama perasmian Forum yang bertajuk "Menjalin Perikatan Baru bagi Pembangunan dan Kemajuan". Ini akan diikuti ucapan khas oleh Gabenor Bank Negara Malaysia, Governor Tan Sri Dr Zeti Akhtar Aziz, pada majlis jamuan tengahari.

Hari pertama forum itu akan diakhiri dengan ucap-tama oleh Susilo Bambang Yudhoyono pada majlis jamuan malam.

Hari kedua forum itu akan bermula dengan ucap-tama oleh Begum Khaleda Zia, yang akan memperkatakan tentang "Kepelbagaian Pengurusan dan Perubahan Ekonomi di Bangladesh."

Hari kedua akan turut menyaksikan Dr Mahathir menyampaikan ucapan khasnya pada majlis jamuan tengah hari. Beliau akan bercakap mengenai tajuk "Zaman Pembaharuan Islam: Kejayaan mengatasi Rintang, Sinergi Bertindak, Kejayaan bagi Semua." Hari Kedua forum itu akan berakhir dengan ucap-tama khas oleh Abdoulaye Wade pada majlis jamuan malam.

Perdana Menteri Malaysia akan menyampaikan ucap-tama penutup dan berucap sebagai Pengerusi Sidang Kemuncak Persidangan Pertubuhan Negara-Negara Islam (OIC) Kesepuluh pada hari terakhir.

"WIEF yang telah diperluaskan itu bukan sahaja akan merintis jalan bagi forum itu membincangkan lebih banyak isu penting, malah juga menggalakkan penyertaan ahli akademik, pertubuhan bukan kerajaan dan masyarakat Islam dari negara-negara bulan OIC," tegas Yeoh.

Forum itu dijangka menyediakan wadah penting bagi interaksi positif dan sihat antara pemimpin-pemimpin kerajaan, masyarakat awam dan masyarakat perniagaan bagi faedah masyarakat Islam di seluruh dunia.

Lebih 500 peserta dari 42 negara dijangka menghadiri forum yang disokong oleh Pertubuhan Pendidikan, Saintifik dan Kebudayaan Islam, Majlis Islam Britain dan Bank Pembangunan Islam itu. -- BERNAMA

SR RAR KTC KY

